

## **Skrifgedeelte: Genesis 3**

### **Fokusvers: Genesis 3:8-9**

#### **Tema: As God voor jou kom staan in jou verlorenheid.**

Niemand van ons hou daarvan om te verdwaal nie. Daarom dat die mensdom elke kort-kort `n nuwe tegnologie ontwikkel om ons te help om by ons bestemmings uit te kom. Of dit nou kaarte, kompasse, GPS'e of Google Maps is, ons wil nie verlore of verdwaal wees nie. Trouens, seker van die grootste gevegte in `n huwelik kan wees wanneer ons mans nie wil stop om rigting of aanwysings te vra nie en ons vrouens hou aan om daarop aan te dring.

Tog raak ons soms verlore en verdwaal en dikwels raak ons verlore in die Here se Woord. En dan raak ons nie verlore in die sin dat ons nie die Woord kan neersit nie, maar in die sin dat ons die Here se Woord vir iets anders wil gebruik as waarvoor dit bedoel word. Só raak ons dikwels "verlore" in Genesis 1 tot 3 in `n proses om `n antwoord te kry oor die ontstaan van die aarde. Ons raak verlore in feite, opinies en teorieë en ons mis die eintlike doel van hierdie gedeelte: om ons te vertel van hoe die verhouding tussen God en mens gebreek het en hoe God se eer op hierdie manier skade berokken is.

Daarom dat die Here God se vraag aan Adam en Eva in Genesis 3:9 só `n besonderse vraag is: "waar is jy?" Dit is `n vraag wat vertel van Adam en Eva, en ook van die hele mensdom, se verlorenheid. Dit is `n vraag wat ons daarop wys dat iets radikaal verander het in God se verhouding met ons, weens iets wat ons gedoen het. Dit is `n vraag wat ons eintlik wys op ons absolute verlorenheid en die feit dat ons dit nie werklik besef nie. Dit is `n verlorenheid wat só groot is, dat dit God tot op `n punt bring om vir Adam en Eva in werklikheid te vra: "besef julle hoe groot julle verlorenheid nou werklik is?" Dit is wat God bedoel wanneer Hy hierdie vraag vir Adam en Eva vra.

Want sien, toe Adam en Eva besluit het om teen God se wil in te gaan, was dit nie maar net `n klein oepsie of `n glipsie nie. Toe Adam en Eva teen God se wil ingegaan het, was dit `n keuse vir `n liefde vir hulself bō `n liefde vir God, dit was `n keuse om God se eer te steel, dit was ondankbaarheid teenoor die groot Weldoener en ongehoorsaamheid teenoor die beste Baas - dit was `n voorkeur vir die skepsel bō die Skepper.

Maar God se vraag aan Adam en Eva is `n vraag wat ook vertel van God se genade, liefde en `n soeke na sy eie eer, want God kom staan voor hulle! In plaas daarvan om net te straf, of om net die aarde te vernietig en oor te begin of om net vir Adam en Eva te laat sterf, kom staan God voor hulle. In God se groot liefde kom soek Hy hulle wat verlore is, sonder dat hulle eers weet dat hulle verlore is en begin Hy om sy eer te herstel nog voordat Adam en Eva besef het dat God se eer beskadig is.

Net reeds in die feit dat dit die Here God is wat die vraag vra, wys ons daarop dat God begin om in genade hierdie verhouding en sy eer te herstel. Die naam "Here" is die naam "Jahweh" wat ons wys op die God van die verbond - die God van die verhouding. En die naam "God" is die naam "Elohim" wat ons wys op die grootste God aan Wie al die eer toekom en aan Wie alles behoort.

Hierdie is die eerste keer waar God voor mense kom staan nadat die sonde in die wêreld gekom het. Elke keer kom staan God voor mense in hulle situasie waar hulle is en elke keer maak God sy

goedheid, liefde en grootheid aan ons bekend. Elke keer wanneer God voor ons kom staan, leer ons en word ons daarvan herinner dat aan God alleen al die eer toekom.

Juis daarom dat Jesus Christus, toe Hy mens geword het en onder ons kom woon het, God se heerlikheid, sy grootheid, vir ons kom duidelik maak het. Dit is immers hoekom die Seun van God mens geword het! Johannes beskryf dit só: "*Die Woord het mens geword en ons kom woon. Ons het sy heerlikheid gesien, die heerlikheid wat Hy as die enigste Seun van die Vader het, vol genade en waarheid.*"

In Jesus Christus word God se eer herstel. Wanneer Jesus Christus mens word en voor die mense kom staan, maak Hy God se eer, God se heerlikheid duidelik. Paulus leer ons dat die gevolg van dit wat Jesus Christus gedoen het sal wees dat elke knie eendag sal buig en elke tong eendag sal bely dat Jesus die Here is tot eer van God die Vader. Alles gaan om die eer van God - ook ons verlossing en wanneer God voor elkeen van ons kom staan en vra: "waar is jy?"

Maar Jesus Christus is ook vol genade en waarheid. Wanneer God in Jesus Christus voor ons as mense kom staan, is dit 'n ontmoeting tussen God en mens waar God sy liefde en genade weer-en-weer vir ons as mense aanbied en waar Hy weer-en-weer die verhouding tussen God en ons kom herstel. Daarom dat God se goedheid en liefde ons tot op 'n punt moet bring waar ons gereeld moet besef hoe wonderlik dit is dat ons wel gevind is wanneer ons in Jesus Christus glo en hoe groot God se genade is dat Hy wel nog voor ons elkeen kom staan.

Dit is egter nie net wanneer ons tot bekering kom dat God só voor ons kom staan nie. Dit is nie net in ons bekering dat God ons kom vind in ons verlorenheid nie. Dit is ook wanneer ons Nagmaal vier dat God voor ons kom staan. Onthou, die Nagmaal gaan nie net daaroor dat ons moet terugdink oor die dood van Christus aan die kruis nie. Die Nagmaal is 'n geleentheid waar ons opnuut gekonfronteer word met die verhouding wat ons met God het en die feit dat Hy in 'n verhouding met ons kom tree het toe ons nie eens besef het dat ons nog nie werklik 'n verhouding met Hom het nie.

Daarom staan die Here, die Heilige Gees, ook vanoggend voor elkeen van ons in ons verlorenheid, in ons worsteling met ons sonde, en Hy vra vir jou en my: "waar is jy?" Besef jy waar jy is sonder God? Besef jy nog die genade van die Here dat jy mag en kan Nagmaal gebruik en dat jy elke dag in die teenwoordheid van die Here lewe? Daarom dat dit ook genade is dat ons elke dag kan weet dat God die Heilige Gees voor ons staan en elkeen van ons elke dag op 'n punt moet bring waar ons moet vra: "Onthou ek waar ek is?"

Elke dag van my lewe leer en lei die Heilige Gees my en lewe ek in die teenwoordheid van die Here. Daarom dat ons elke dag moet bid dat God die Heilige Gees aan ons sal gee, want onthou, God gee die Heilige Gees aan elkeen wat Hom met hulle hele harte daarom smeek en daarvoor dank. En daarom dat ons elke dag moet bid en vra dat God ons bewus sal maak dat Hy ons gevind het nog voordat ons heeltemal besef het dat ons verlore is.

Daarom dat die Here ook nou voor elkeen van ons staan en vra: "Waar is jy?"

Amen